

摘藻堂四庫全書薈要

集部

欽定四庫全書薈要

集部

盤洲文集卷四十八

五至

詳校官助教臣謝登雋



欽定四庫全書薈要卷一萬五千七百九十五

集部

盤洲文集卷四十五

宋 洪适 撰

章奏五

乞出第一劄子

十一月十六日

臣聞棟楹

棟楹橐橐材之大小不齊者若梓人以棟為橐以

橐為楹則覆壓之患當在朝夕聖主用材顧豈梓人之
比然此言雖小可以喻大臣叢爾疲駑自幼以綴文為
業志在塵竊一第而已不自意留落之後誤叨眷知擢

在華近若使之掌制代言自視猶可勉強今承人之乏
遂超邇列而使之謀王體斷國論天下之人皆謂不勝
其任黽勉數月曾無涓埃之補直情徑行浸積仇怨內
之既不能識拔實材使之穆穆列布以助成勵精之治
外之又不能消弭姦宄致令民弗奠居而無鉏耰之策
揆之漢法當在石慶切責之科倘或強顏患失則誤國
之罪誅之無益伏望陛下推天地之大恩憐斗筭之無
用曲賜保全許臣上印綬而去庶幾不妨賢者之路干

冒威顏臣無任

奉御筆降詔不允
不得再有陳請

第二劄子

十七日

臣昨早具劄子乞解機政跼踖踰夕未聞天旨不避斧鉞再輸情悃伏念臣一介疵賤初無致君澤民之學仕於州縣米鹽靡密畏簡書理獄訟尚猶少有所長今驟居高位掌樞獨久而政路贊襄上無台揆軍國重事豈非材嘗試之地小智曲見乖繆浸彰加以心力凋耗事至輒忘若視蔭空餐不能知難而退則罪愆日積將不

可赦伏望睿慈察其不逮賜之歸田則未淪溝壑之前
皆銜恩之日月渚瀆宸嚴臣無任戰灼俟命之至取進

止

奉御筆再
降詔不允

第三劄子

十八日面進

臣比殫誠悃冒犯咫尺顏面拜恩私再降溫詔銜感之深
淪胥心髓伏念臣疎遠冥頑孤立無援偶因清燕浸簡
宸衷擢之禁途馴至政地奏啟之際每蒙嘉獎臣受陞
下之知不為不厚常謂粉身糜骨不足圖報夫犬馬尚

能戀主顧臣豈應輕為去就以忘陛下隆天厚地之恩
但以臣材局褊淺智識蒙昧既無嘉猷遠畫可以振起
治功而不量其力欲抑僥倖以奉陛下正紀綱守法度
之訓所慮積日累月寢招衆惡進無所補虛負使令此
臣所以日夜恐懼不安其位傾瀝肝鬲冀回天聽伏望
聖慈曲賜矜宥三瀆嚴威死有餘罪臣無任戰灼悸汗
之至

辭免除右僕射兼樞密使劄子

臣伏蒙聖恩除臣尚書右僕射同中書門下平章事兼
樞密使特降中使宣押臣赴都堂治事臣聞命震驚罔
知所措竊以人主居崇高之位一日萬幾獨以論相為
職蓋用人賢否關國重輕繫民休戚非百執事之比必
有負王佐之材隆巖石之望者斯能副眷注之意古之
人居畎畝之中樂堯舜之道其尊主庇民之業皆素定
於胸次故達而在上發其緼蓄可以使是君為堯舜之
君使是民為堯舜之民功烈著於當世名譽垂於無窮

若是則居其位食其祿仰無所愧俯無所忤如臣者翰
墨腐儒斷無它技智效一官猶懼不及乃使之代天理
物其覆餗可日月冀制命既傳群聽已駭伏望陛下曲
回淵鑒洞察赤情圖任人英勿嫌反汗庶幾微臣得逃
非據之大譴不至重為天下後世之所詆訾干犯天威
臣無任

乞薦舉監司郡守劄子

十二月十六日

臣聞內治之急在乎官得其人今州縣之間儻監司郡

守皆賢則職事修舉下無蠹弊屬吏之能否如鏡燭形
無所逃隱自數年以來非不開薦舉之路而風俗未變
挾私勝公干請奔競曲為題目剡章所譽非其親舊則
是蒙恩託契之家或甲乙宛轉更相酬報名為公薦多
是私心故薦牘雖交於公車有司亦視為文具置籍中
書未嘗舉行臣以駑下偶補台輔之闕見識不明聞聽
不廣遠近人材臣不能知其一二若賢者退而家食仕
者不稱其職臣則有罪欲乞令侍從臺諫兩省官舉風

力堪為監司吏能堪為郡守者各一人三衙知閤舉材
武可守邊者一人舉而不實甘坐其罪俟舉牘既集臣
與同列采其名實相稱者一一除授或未有見闕則簿
錄以待有闕日先除各於除書內稱列所舉主某名它
時若有治行著聞則乞推進賢之賞若所舉之人或進
對不稱旨或為臺諫論列或為監司案劾或為百姓訟
訴驗治有狀隨其罪之大小具舉者姓名取旨必罰若
宰執徇私隱而不奏者亦乞懲戒庶幾實材輩出振起

治功天下幸甚取進止

以霖雨乞罷政第一劄子

乾道二年三月

臣伏見季春之月天多陰晦而盛寒如冬大雨仍降蠶麥秧苗俱有損壞仰軫聖慮致於玉食頻去葷味變理如此罪將安歸而又僕僕祈求羞對輿阜儻或患失不去必致人言伏望睿慈特賜譴絀庶幾可以調玉燭而格豐年干冒宸旒臣無任

御筆霖雨稍多未至有害於蠶麥降詔不允不得更有陳

請

第二劄子

臣以斗筭之資竊台輔之位夙夜危懼莫知逃責之計
涉春以來常陰為沴禱竺宮以迎梵像放房緡而蠲門
稅一月至再矣變調無狀靡所錯躬上之則使太官屏
常珍而進蔬饌下之則使農夫紅女懷耕織之憂臣之
罪多矣隆恩天覆不即策免臣上章自劾拱聽威命而
宸札矜容不准罷退降詔之訓異於常典銜感隕越

闕

行漢法罷遣歸田圖任異材俾熙

帝載則和氣感召咎證可消矣干觸天聽臣無任戰汗待罪之至

再乞罷任劄子

臣材劣能下無足算錄誤叨眷知超居宰揆力小任重自料必致顛隳比以淫雨為害抗章請罪仰蒙聖恩拊以溫詔今早再瀝誠懇又勤天獎使之安職公議不貸遂玷霜簡仰負陛下使令之意雖九死無以塞責伏望睿慈令臣解罷機政以聽譴罰之命干犯咫尺威臣不勝

震灼之至

辭免觀文殿學士第一劄子

臣伏聞已降制命特授臣觀文殿學士提舉江州太平興國宮任便居住臣驚傳恩旨感涕橫臆伏念臣不材無取誤蒙簡拔輔政旬月曾蔑補報孤負任使浸積過僇竄流遐遠乃法之宜豈期優恩曲垂軫卹使之奉祠還鄉已為大幸書殿隆名所以寵老臣碩德之去豈凡庸罪戾之人可以叨此非常之渥若或冒處益重疾顛

伏望聖慈前旨停寢庶使危踪免抵大譴干犯宸嚴臣
無任

第二劄子

臣伏准閣門降制告

闕

臣仰窺制命

感涕交流伏念臣竊位台衡在臺無補小器盈滿福過
災生罪愆既彰難免清議倘非聖明憐惻則尸諸兩觀
未足塞責臣自聞寵渥已瀝懇辭跼蹐至今未蒙追寢
夫書殿美名清班優祿皆非臣所當得若或貪居冒受

則大譴大呵益重顛覆伏望聖慈特賜處分所有告命
臣未敢祇受

辭免知紹興府第一劄子

今月二日伏准遞到尚書省劄子七月十八日奉聖旨
除臣知紹興府臣跽聞寵命不勝戰兢伏念臣材力絀
薄智術乖疎比自入朝獨叨眷遇超居宰揆燮理無功
百謫既盈罪當竄殛聖恩寬大委曲保全奉祠還鄉纔
逾兩月敢謂軫記不忘即加選用捫襟感泣何以論報

念稽山密拱行闕實推雄藩豈伊罪戾之餘可堪師帥之任伏望聖慈改授真材用協羣議免使孤蹤重罹顛沛干冒宸嚴臣無任隕越俟命之至

第二劄子

臣近具奏劄辭免知紹興府恩命今月二十二日准都進奏院遞到詔書一道伏蒙聖慈降詔不允者臣伏讀聖訓感涕交流伏念臣疎庸之資嘗試無狀狼狽去國方此省愆宸眷不遺屢垂簡記亟加收拭付以大藩仰

惟天地之隆恩即當聞命而引道載念陪京之重夙稱
謀帥之難而臣聞望素輕譴呵未久深虞曠敗復累生
成輒瀝愚衷洊干洪造伏望睿慈憐其無用許令依舊
奉祠庶休田里之居獲享治安之樂所有恩命臣未敢
祇受干犯天威臣無任感戴戰懼俟命之至

除紹興第一手劄子

八月四日

臣入朝二年居輔弼之官十閱月以駑鈍無用之資識
不足以燭微才不可以任重獨蒙陛下眷知異等寬其

不逮之罪溫顏殊禮常賜稱獎臣殫智竭誠亦欲盡死
以報奈何福過灾生招致人言上惑聰聽聖恩寬大不
忍竄逐使得以秘殿真祠優游里閭臣方懼叨縻廩稍
無所云補豈意簡記之隆付以近鎮驚懼感泣不可具
言已瀝忱誠懇祈寢免臣犬馬戀軒之情雖食息不敢
忘隆天厚地之恩但以得罪去國不敢奏牘輒至冕旒
之前今者既蒙睿慈再加收用故敢略披梗槩臣螻蟻
賤微銜戢恩渥何以圖報干犯宸嚴臣無任戰懼之至

第二手劄子

臣近貢免牘仰扣九閭伏蒙天慈賜之溫詔臣素叨眷
遇之異仰惟選用大恩便當即日上道特以會稽近藩
衆所指目而臣罪譴之餘去國未幾若或貪榮疾趨必
致重遭譏詆輒敢稽留詔命復布悃誠已別具奏劄乞
賜施行伏望聖慈察臣愚衷赦其再瀆之罪臣干犯宸
嚴不勝戰懼之至

第三手劄子

臣比辱誤恩俾守輔郡荐殫誠悃弗獲俞旨不敢重干
威聽已祇拜告命取信州路自衢入婺迤邐到越謹具
奏稟伏乞睿照

第四手劄子

臣今月二十一日准省劄奉聖旨令臣疾速前去之任
臣自叨除命以言者方在要路實有所畏兩具免牘塵
紊淵聽仰蒙詔旨不允臣方敢治行偶臣以感冷卧疾
稽留數日遂至再勤聖訓臣已即日就道伏望睿慈特

賜原赦

到任手劄子

臣叨拜恩除去京城不遠天日在望犬馬結戀之心非
不願一瞻清光少殫懇悃蓋以人之多言必有譏議故
不敢陳乞過闕今已到越視事唯知鞭策駑鈍庶幾少
副任使之意瞻望闕庭臣無任感恩激切之至

盤洲文集卷四十五

欽定四庫全書薈要卷一萬五千七百九十六

集部

盤洲文集卷四十六

宋 洪适 撰

章奏六

請祠劄子

臣蒙恩守越亦既半載不敢養高尸祿事無巨細必躬
必親將期寸效仰副器使而到官以來偶與風土不相
宜無月不有寒疾氣血頓衰髭鬢俱白近因冒冷每夕
出汗飲食減少筋骸羸瘁自節假之後在告又踰半旬

深惟輔藩重寄非卧疴之地若或因循曠弛必致不免
大譴夙夜憂懼心如焚灼欲望聖慈察臣誠悃賜臣祠
祿以歸休里巷庶幾訪求藥餌不致遂委溝壑干犯天
威臣無任戰慄俟命之至取進止

秀王夫人薨慰劄

臣恭聞秀王夫人奄忽薨逝仰惟聖情不勝哀痛臣忝
居舊弼密邇宸居不獲隨班稱慰臣瞻望闕庭無任屏
營之至

慰莊文皇太子奏劄

臣恭聞皇太子奄忽薨謝驚傳凶訃無不慘傷仰惟陛下篤天性之愛念國本之重聖情悲切何以勝處臣忝居舊輔嘗邇班聯追想慈仁篤厚之德金昭玉粹之姿含酸飲泣不能自己恨以身在外服不得奔走儲宮哀臨伏望陛下歸之天數特抑哀悼臣瞻望闕庭無任屏營之至

請祠第一劄子

八月十日

伏念臣待罪會稽行且滿歲竭力奉職僅逃曠弛緣郡
治鑿山作室夜氣與平壤迴殊臣孱劣之軀早衰易病
秋風稍繁便已伏枕而比年以來目昏花而不明耳作
聲而重聽視燭下之牒訊庭前之訟頓覺費力日以滋
甚倘不早祈休息將遂淪於鬼錄加之妻息婦孫之衆
呼醫求藥項

闕

今戒寒在辰惴惴然有故疾之憂

若又卧病以廢事瘵官必致大譴是敢披瀝胷臆仰投
君父伏望聖慈赦臣罪戾許臣奉祠而歸少賒殞陪之

期實出乾知之造干犯宸嚴臣無任戰慄俟命之至

第二劄子

臣比殫誠懇覲望叢祠入奏大庭未聞俞允重念臣治越以來黽勉職守訟訴不曾淹留囚繫亦復稀少而蠲削饋遺省節費用錢穀粗有儲積支遣不致闕乏非是託故避難苟求安便特以蒲柳之姿望秋先衰深恐入冬又復多病兼孥累之衆率皆不伏水土藥裹關心略無虛日盡室於此不寧厥居臣之事君靡容有隱輒犯

再瀆之誅復披悃幅庶幾得遂前請若或聖慈未聽臣
投閑置散則恐便鄉去處別有使令乞賜選擇尚期罄
竭圖報萬一塵忝聖聰臣不勝皇懼待罪之至取進止

自劾劄子

十八日

臣近者累章乞祠蒙恩降詔不允已具奏牘欲申前請
忽見李大正罷章臣又不能自恕輒敢復干威聽臣伏
見今日仕宦莫難於作縣臣所領郡獨會稽李大正其
吏材治績為八邑之冠臣嘗草薦章乞行旌擢未及投

進緣其人賦性鯁直肯任怨以草弊拒却請託摧抑豪
右雖諸監司有隱亦奉法追治略不假借故人多怨之
自柳大節到任中懷私意輕信讒言多方捃拾皆無事
實却於上年二月本縣推排不合減退浮財及今年五
月闕必有情弊令婺州追押錄以下十餘人鞫

勘李大正既經朝省聲冤乞移獄未見施行臣遂與之
備申益所惜實材能吏無辜冤抑即非容庇姦賊與之
為地今柳大節已遭論列將及兩旬旋作日前按章罔

上行罰以伸其私憤所謂和買即是轉運司備坐都省
批下朱申狀所乞依上虞三縣例自物力十五貫均敷
臣為見此事係案顯知上虞縣日所行百姓既以為是
攀援有請朝廷既令施行州縣豈敢違拒臣既已依稟
行下亦曾榜示諸縣人戶候有詞訴即類聚看詳續行
申明改正今來柳大節以此歸過於李大正而劾之大
正既已放罷臣亦不能無罪臣已先次發遣家屬歸鄉
將職事牒以次官主管見今家居待罪伏望聖察特賜

罷黜施行干犯宸嚴臣不勝震懼之至取進止

奏水潦劄子

八月二十八日

臣今月二十七日得轉運司報奉聞聖旨累次詢問浙東被水傷損禾稼仰見陛下憂民之誠意伏念臣所管新昌嵯縣因閏月中旬大雨接連台明諸山相繼發洪下流至曹娥江又值潮大內外水勢相合故三縣臨溪皆遭水患臣已將公使激賞庫儲積到錢一萬貫撥入常平案專充賑卹支用差司戶何萬同縣官逐一相視

量損壞屋宇支錢修葺計闕食人戶給散錢米訖自此數旬之內連併淫雨雖三次祈禱得晴不三數日又復雨作遂致水潦前後盈溢有傍江鄉分已即時差官開掘塘岸泄放緣會稽數邑少有高仰地段農民併力撿救收刈所積濕稻又復生芽在田者皆為水損目今祈禱再得晴霽已三日盡皆乘急攤曬打簸若自此無雨尚可收拾殘零稻穗統計紹興八縣田畝除早稻中稻豐熟外晚稻居十分之四今來所損約已一半本旬軍

人打請正當霖雨未晴之際每石米價頓增一貫雖取
會到逐縣被水鄉分明具回申投運司未有田畝子細
數目依條八月三十日人戶投狀即行覆實檢放伏乞
審照

契勘諸縣發洪水去處因暴水衝擁塘石坍毀田畝
復為溪坑非數十年逐旋鋤闢不可復耕及有潮水
衝打坵角入江者自來轉運司只是枝蔓行遣不肯
從實倚閣致使農民無以出稅實為經久之害今看

踏到田段數目逐一開具伏乞聖察

再奏被水人戶劄子

臣近遣官往上虞新昌嵯縣賑卹水災逐一循行了當緣山水夜至衝去茅屋弱婦幼子死於非命共四十九人各已等降給錢使之修葺葬送自六貫至一貫共計六百三十六家已令諸縣將被水下戶見欠稅租官物並各住催據所欠數臣將公使激賞庫錢代為了納其闕食人戶已催促抄劄實數即行支米賑濟所有因雨

水浸損禾稻之家各已受狀分差官屬檢視訖伏乞睿
照

試驗揀汰人劄子

戊子正月二十二
日上二月一日依

臣近准樞密院行下史正志陳請令諸路將揀汰使臣
銓量人材非老弱者具名申上本府共有一百五十餘
人臣將揀選到人躬親看驗亦有年未五十身無疾病
可以從軍者却稱筆吏出身不習弓馬乃是竄名冒賞
分明臣竊謂近歲軍賞太濫無以矯革此等人既已寄

名得官隨踵離軍便與向隸行伍人一等注授概與差遣俸祿相繼更不待闕終身徼幸誠為太甚臣愚欲乞行下諸路向後揀汰使臣到任並令知通共職官逐一子細試驗其年未五十非有廢疾之人若或不習弓馬即發回吏部令與在部人衮同理名次差注庶幾履行陣場矢石之人有以甄別伏望睿察更賜揀汰如臣言可採乞賜施行取進止

再請祠劄子

臣待罪會稽於今一歲有半去秋累上奏牘祈勾叢祠
仰蒙大恩疊賜詔札時方水潦四溢穀直頓增人情嗷
嗷朝不及夕臣懼有避事之嫌黽勉就職所幸踰冬涉
春米價如舊人不告病境內無流冗之患宿麥在野秋
熟有期臣以衰瘁之軀不安風土疾疹相繼願欲少休
伏望睿慈曲賜矜容俯從誠情倘他時別有使令不敢
辭避干犯天威臣不勝跼蹐戰越之至取進止

謝宮觀劄子

臣駑劣之質略無所長猥叨誤知躡居宰路調鼎三月
自誓竭誠奉公仰報恩紀而才疎智淺曾蔑涓埃之補
讒言不恕以為罪積丘山非陛下特垂昭鑒則投荒不
足以塞責去國不久即忝輔藩之寄雖欲抑強去惡力
圖薄效而翫日積久復無尺寸之功聖恩寬大俯從懇
請遂獲奉祠以休衰瘁伏聞近者弟邁進對曲蒙齒錄
復加恩獎貸其罪戾未忍棄捐臣銜戢恩遇徒深感泣
臣實非才雖碎首捐軀安能圖報天地之大德臣既奉

勅命已即指塗益遠觚稜不勝瞻天戀聖激切屏營之至

奏旱灾劄子 八月十二日

臣仰惟陛下焦勞圖治勤恤黎元講求民瘼不啻飢渴一聞休戚即日罷行患在士大夫畏縮自愛不肯道其實故下情鬱而不達聖澤壅而不流古之人雖在畎畝而有封章之獻至或嬰逆鱗而不顧此風久不聞矣臣不材無取嘗玷宰路非芻蕘庶人之比也居閒故里目

之所覩耳之所接不忍斯民日趨無告流亡捐瘠莫之
拯拯若私有遐心茹而不吐尚饗祠官之祿以自活其
妻孥是曾狗馬之不若也故不避譏議不憚譴呵矯首
九閭披寫愚戇伏望陛下少垂意焉臣比讀邸報伏見
陛下以江西湖南旱暵側身禱祈屏徹葷味又令帥臣
監司汰擇守令德至渥也臣謂江東兩郡之旱亦江西
湖南之旱也陛下必不慮遠而忘近恤彼而緩此特未
達于天庭爾及覩七月下旬施行洪潭兩路賑恤旨揮

猶未及乎江東兩郡豈有司奏牘或未詳查不能感動
天聽耶臣於是不謀於人而謀於心不慮其身而慮其
災輒敢犯分言之臣之鄉邦自去夏五月至於今春曾
無終日好雨故陂塘所瀦之水甚鮮並水之田僅能車
畎播種至於高仰之田種不土入者四境之內居三之
一自春接夏或累日或盈旬間得小雨尚或不能破塊
壤地龜坼早稻焦枯其瀕水低田有歲收千石米者今
有百石之穀若是者蓋無幾也通六邑之中百分不獲

一二自夏接秋惟六月甲子得數刻之雨既不瀝潤亦不周徧節過白露驕陽轉甚晚稻又復槁矣常歲八月民種蕎麥可充一兩月糧異時飢僅得蘿蔔雜菜和米作糜亦可度日皆以久乾土硬而不可種自此不雨則來年薏麥特未可望小民艱食或有攜妻子赴井同死者或有聚衆強糴而相殺傷者或有逢縣尉而持刃拒抗致憲司傳以為賊而出兵掩捕者前月提舉官吏俟入饒州界親見流民襁負係道俟恨無以留之今去者

紛紛至於卒歲將十室九空何以為邦自來水旱未嘗
早計絕粒所闕廩食不過開歲數月饒州去秋已小歉
今年早禾不獲自季夏而食闕若秋冬之交有雨澤有
人力可以藝麥逆數成熟尚有七八月期士民上戶鮮
有隔年之儲猶無以自贍其家故耕夫轉徙所不遑恤
率是交還牛犂泣辭而後去所留牛犢無水可飲無稗
可積不保其存也田家營穀作種尚且艱難若人牛又
闕則向去春耕益為可慮蓋今歲之早起於饒州若池

之建德東流與饒境相接者亦薄旱饒之德興浮梁安仁數村與徽信相接者則微有所收江東之旱惟饒與南康兩郡出境則江洪以往亦旱也父老七十歲者云自歷年以來所未嘗見今州縣若不免租則有田者無以輸納若放苗不收則州縣何以給遣竊聞饒州有前年樁留三萬石米已借充官兵月糧所餘止有萬石朝廷捐以與之不過可支一月見在常平義倉二萬餘石併得去年儲粟賑贍尚不能足蓋六邑窮民有籍於官

者二十萬戶且約一家三口家得石粟僅能飽其一月之腹爾倘官無餘粟野有餓莩歸之天灾無可奈何可也不得已有秩者暫閣奉稍亦可也飢餓之民散而之四方不至聚而掠奪為盜幸也數千營卒一月無糧其肯俛首餒死乎臣區區過計非私於鄉邦而然也恐他日重貽旰食之憂故具述凶歉之實以聞不敢妄及臆說伏望聖慈察其心而信其言拯其灾而弭其患臣不勝戰汗待罪之至

貼黃 臣居鄉田疇至少大熟之年所收不過千石四子因官置到共有數百石通一歲秋苗纔百有餘石非是營私飾說前件所奏尚猶不盡瑣碎若朝廷密遣人察問有一欺誑甘伏罔上之罪伏乞聖察

劾管瑒奏劄

庚子八月六日進入九日管瑒降兩資其舉狀令吏部退還

臣久去軒陛不勝犬馬之戀伏見陛下留意薦舉開防再三然法出姦生弊不可草臣竊謂朝廷行黜陟之政臣下寄刺舉之權惟前宰執有舉無刺眼見姦蠹吞聲

切齒今舉吏有罪不容緘隱伏望聖慈少賜審覽臣今年二月二十日以前去年第四紙改官文字薦舉饒州樂平丞管璆續次持書鋪筆帖來云奏檢以五月十七日到闕限期甚迫遂楷改作二十六日投進既至考功為銓吏點檢問難乞將奏檢移易日子前來符合管璆委曲懇禱臣語之曰書鋪為蛇畫足自奸罪譴尋常州縣換赤歷移月日固或有之此乃需章若旋易日辰便為罔上不敢相從不謂管璆自將元檢輒行改換盜用官

印行賂計會已得放散敢為如此他日進步何所忌憚
豈可保任終身臣已具狀申部乞追人根治臣自發之
罪伏乞淵覆曲賜原赦瞻望闕庭臣無任戰懼之至取
進止

盤洲文集卷四十六

欽定四庫全書薈要卷一萬五千七百九十七

某部

盤洲文集卷四十七

宋 洪适 撰

章奏七

繳太史局轉官劄子

十月初三日批旨楊覺民等轉官恩例候試補直長

了日
收使

臣准中書門下省送到錄黃一道為太史局靈臺郎楊覺民等四人依醫官能說例該遇覃恩轉官令臣書行者右臣取會到太史局遷轉資格自局令至直長共九

階並係十年無過犯方許下磨勘諸靈臺郎滿二年遇直長有闕必須試歷算科方許轉行近者朝請至中奉大夫該遇覃恩亦曾引例得轉行一官因臣前論列並作減四年磨勘其伎術官於赦文中初無轉官之文而靈臺郎必須經試方可轉直長縱使合轉一官正與朝請大夫以上一同若輒攀醫官例暗得轉行則為靈臺郎豈盡皆不試而遷誠為冒濫今來欲乞將楊覺民等依武臣轉官法與減五年磨勘所有錄黃臣未敢書行

謹錄奏聞伏候勅旨

繳候進詞頭劄子

十月十二日御筆依奏三省進呈委方滋根究詣實具情

犯聞
奏

臣准中書省送到武功大夫鎮江水軍統領侯進降官
詞頭令臣撰詞進入臣昨在鎮江守官聞軍中稱說侯
進帶官錢五萬貫往湖北買木數年無歸意就峽州宜
都縣起造大第招聚倡樂宴會奢僭縱使兵卒陵虐居
民奪其物產用竹纜馬船橫截江流聲鼓鳴鑼邀遮客

旅決打號令強拘簪笏一方苦之甚於豺虎都統官累
曾催督遷延不回今係荆南帥臣李道因民旅陳狀告
訴不法事件及校尉胡振甘反坐之罪訴其聚集亡命
圖畫入川地形恐有不測李道備申朝廷送提刑司差
官體究雖多從闊略而攔截客旅等事並是詣實戶刑
部看詳恐追人路遠淹延刑禁遂降一官放罷臣竊見
聖斷方欲痛治姦賊之吏如侯進以官鉅數萬緡逗留
不歸肆其克暴少有此比兼李道申侯進初到便經帥

司陳狀乞將民間夾江林木盡行批號倒伐不許占悞
帥司不從至於出榜禁約可見無所忌憚只降一官太
為輕典今若釋其害民之罪則侵盜官錢所不可縱臣
愚欲乞行下都統司抄籍家資令荆南帥司拘收屋業
送就近鎮江府取索干照根究錢物依新降旨揮斷罪
施行所有制詞臣未敢撰入取進止

繳王之望結局轉官劄子

十一月四日當晚進
入次早御筆依奏

臣伏覩十月二十六日指揮淮西宣諭司結局其官吏

軍兵並依汪澈例等第推賞令開具申尚書省取旨臣
伏見汪澈督師襄漢之時強敵對壘嘗交鋒刃一行官
吏頗亦憂危及寇退師還以次行賞第一等轉兩官第
二等轉一官更減二年磨勘第三等轉一官選人亦有
改官者當時清議尚以為過今歲淮西外無邊警如一
府官吏坐受恩賞竊恐屯戍之人不無怨望倘俟其開
具姓名始行封繳不若寢之於未然庶幾免開徼幸之
端所有前降旨揮臣雖已書行欲望聖斷更賜詳酌施

行

繳李迥差遣劄子 十一月七日

臣准中書門下省送到錄黃一道右宣教郎李迥差監
行在左藏東庫臣伏覩見行條制初改官人惟有出身
許授學官其餘必須注授知縣親民差遣蓋慮仕進之
人不歷州縣他時除用不能通曉民事此萬世不易之
良法也間或夤緣干請有得宮觀以脫親民之官者公
議猶或非之今李迥係用臣總領所薦舉文字於今年

八月改秩若便作京局釐務官則破法起例蓋自此始
雖係臣門生難以容私緘默所有錄黃臣不敢書行取
進止

繳王若鈿用居廣恩例劄子

十一月十一日
次日御筆依奏

臣准中書門下省送到錄黃一道皇兄岳陽軍節度使
居廣乞以初除開府儀同三司合得親屬占射差遣恩
例與將仕郎王若鈿收使十一月八日奉聖旨差監文
思院上界臣仰惟陛下以任子之冗尚思更張之術今

必令銓試入官乃所以使世祿之家頗知務學不敢徼幸門蔭便萌彈冠之心檢照隆興元年四月指揮初出官選人不許用父祖親戚應合得恩澤免試雖見任宰執亦不許陳乞回授若放行王若鈍一人則繼踵而來無以救官冗之弊矣欲望聖斷特賜追寢已降指揮所有錄黃臣不敢書行取進止

繳巫伋召命劄子

十一月十九日上即日御筆依奏封付洪某

臣准中書門下省送到錄黃一道十一月十八日奉聖

旨巫伋陳俊卿呂廣問王時升並召赴行在臣伏見春秋之時諸侯互相爭戰其覘國者不論其地之大小兵之強弱惟視其人材如何故朝多君子則敵不敢伐茲已然之明驗也如巫伋者才學識見政事操履略無一長徒以諂事秦檜為之鷹犬故能躡取大官今廢退十年議者不以為屈寄寓無錫縣專以私酤為生裒聚無賴為害一邑方多事之際雖販繒屠狗之人果有所長亦不應棄若其無用何所取材雖云嘗為執政有此虛

稱初無時望品其人物誰不過之召節一馳取笑中外
秦檜殘黨如汪勃章復宋樸之徒與伋初無優劣近因
言者奪其三人復職若伋收召則勃復之流人皆冀其
復用矣伏望聖慈特賜鑒察所有錄黃臣未敢書行取
進止

繳汪汝嘉等差遣劄子

閏十一月六日
當日御筆依奏

臣准中書門下省送到閏十一月二日錄黃一道數內
汪汝嘉差知荆門軍李琛差知永州宇文仔差知邛州

臣伏見汪汝嘉昨因手刃表弟李穎停官編管數年之後交結秦檜親黨復還仕版幹辦諸軍審計日常躬親摔毆公吏遭臺章放罷稟性兇麤不知懲創李琛之守婺州專以刻剝為政苞苴秦檜之門恃勢妄作減尅軍兵請給幾至生變郡人有寧與猛虎遊莫遇李婺州之語劾罷已久自知潛伏今已七十有餘耄昏戒得宇文仔新授果州通判意欲別營差遣妄訴於都堂稱有女嫁知州丁訥之子合行迴避省部送本路勘會詣實未

到間有丁訥之弟丁顏亦訴於朝稱兄訥本京東人寄居湖州三子皆未娶本宗並無人與宇文氏連姻妄冒如此何以臨民臣愚欲乞令汪汝嘉李琛終滿今任宮觀宇文仔依舊果州新任差遣所有錄黃臣未敢書行取進止

繳趙密恩數劄子

閏月八日當
日御筆依奏

臣准中書門下省送到錄黃一道閏十一月六日奉聖旨趙密已除少保依前崇信軍節度使落致仕權殿前

司職事所有合得恩數等並依楊存中昨除少保日已得指揮施行臣取會省部條格即無三少初除恩數向來楊存中係特降旨揮依簽書樞密院事例今來趙密元因致仕得除少保近於再仕議者謂當納還三少始闕者則謂其權掌禁兵若三衙休息諸帥回歸密必依舊請老雖不納少保可也今若無故而輒依前比後省部緘默放行恐不免於清議所有錄黃臣未敢書行取進止

繳莫汲編修官劄子

閏月十二日次
日御筆依奏

臣准中書門下省送到錄黃一道閏十一月十二日三省同奉聖旨莫汲除樞密院編修官臣伏見秦檜專權之久至其末年欲禽取天下賢士大夫而誅戮之檜雖奮殺人之心必有負屠宰之材蘊虎狼之性挾戈矛之刃者為其用而檜之志始可逞也張常先之謀張宗元莫汲汪召錫之圖趙令衿凡是數人適檜之死令衿輩始免於刑戮太上皇帝更化之初即日竄之嶺海天下

之人以比四凶陛下踐祚覃曠蕩之澤此輩始得生還
正當奉頭鼠伏杜門苟活不自齒於薦紳可也雖古有
使過之文朝廷收拭丹書何時無之至若此等凶人縱
使有荀孟之學班馬之文亦不可以其才而復用蓋廢
錮一人使世之嗜進喜禍者不敢萌吞噬忠良之計所
以銷姦賊於未然之前也如汲者雖以試藝登高第而
不自愛關
碌碌州縣塵埃之職猶
之可也關
入中都列屬西府而出入省掖從

容宰輔之間耶除命一出衆論必駭臣不敢避怨為人
禁害使後之士有以懲戒覆車之轍而修為君子之歸
也辟猶虎豹豺狼當放之於深山廣谷之中若置之苑
囿則騰擲圈檻不可復制矣所有錄黃臣不敢書行取
進止

繳余堯弼職名劄子

閏月十四日當
日御筆依奏

臣准中書門下省送到錄黃一道信州奏左中大夫余
堯弼為筋力衰憊不敢久竊祠祿乞守本官致仕閏十

一月十三日奉聖旨復龍圖閣學士致仕令臣書行者

臣伏見章復因致仕復龍圖閣學士言者論列併與汪
勃宋樸而奪之今纔數月爾堯弼復託疾請老亦得此
職夫龍圖之去端明一間耳異時執政無瑕而退僅得
端殿豈有積愆久廢之人一命遂居六閣學士之首者
此除若行則同類者又將群起而不可遏在秦檜時堯
弼以臺諫而為鷹犬坐政事堂而伴食其無用而易制
蓋勃復一流人也今勃復失之於前而堯弼得之於後

一子一奪有損陛下總核之政是使齷齪之士知可以竊位於一時而不妨叨榮於末路則隳喪名節爭巧宦以希進矣所有錄黃臣不敢書行取進止

繳莫汲計議官劄子

閏月二十四日次日御筆改幹辦公事

臣近於今月十二日以莫汲除樞密院編修官嘗論其謀殺趙令衿之罪具劄子封駁即蒙御筆依奏繼有沈介薦章稱其智略縱橫才力明敏乞授一光州差遣或制置司職任使之招諭皇甫個餘軍及收復光州伏覩

御筆莫汲可差充沈介屬官至二十日執政批旨却作
勘會湖北京西制置司合差參議官二員奉聖旨莫汲
差充計議官候立功效日陞擢所有莫汲過愆臣不復
縷數以瀆天聽但汲元係左從事郎坐罪編管化州更
大赦放令逐便臣取會吏刑部赦後即不曾叙復元官
自用兵以來有都督府樞密督視府江淮宣撫司荆襄
制置司川峽及兩淮宣諭司若宰執開幕府則從官作
參贊其他官屬則有參議多係卿少郎官及曾歷監司

郡守者為之其次則有幹辦公事准備差遣應是選人
只作准備差遣近歲莫汲在虞允文制置司亦是准備
差遣今忽超躡常制新立官稱聞者驚異其事自來臺
諫彈擊給舍繳駁之人未嘗隨踵收用或有他時澡濯
而起者其初必與降等差遣蓋示洗垢棄瑕之漸今汲
因臣封駁反升等創置官名以寵之又許以他日陞擢
則臣語言妄發實有不合封駁之罪雖蒙聖度優容臣
實何顏尚居禁掖臣等侍朝殿乞對已三日居家自訟

不敢入省欲望聖慈特賜黜責庶幾後日居兩省者不敢輕議朝廷用人得以懲戒冒犯天威臣不勝戰汗之至取進止

盤洲文集卷四十七

欽定四庫全書薈要卷一萬五千七百九十八

集部

盤洲文集卷四十八

宋 洪适 撰

章奏八

繳張訓通復官劄子

乾道元年四月三十日

臣准中書門下省送到詞頭一道刑部檢舉到張訓通
叙官元係張俊奏宿州之役初非戰敗而統制官等無
故引歸殿前司統制官張訓通係軍馬入城之際先次
一面引歸欲望酌情定罪明賜貶降奉聖旨張訓通降

四官本部看詳依條合自降斷勅日每理再期一官本
人期限未滿間該遇赦恩合叙一官元係正侍大夫和
州防禦使因罪降授協忠大夫果州團練使奉聖旨依
所申於階官上與叙令臣命詞給告臣伏見張訓通弓
矢鞍馬漫無寸長怯懦不武又無與為比但能涉獵七
書百將傳藉此以為談柄隸鄂州軍籍之日與田師中
典掌財物背公營私叨冒官秩至於橫行遙郡苻離之
役首先遁逃原情定罪戮之市朝如孔福可也既從輕

典鑄官自効有司却與尋常罪犯之人會赦便與叙復
竊懼無以懲戒將士臣愚欲乞將張訓通同罪之人並
候軍前顯立功效之日大將保明取特旨方許牽復庶
使從軍之人咸知復玷缺之艱難不敢愛身誤國所有
詞頭臣未敢撰述取進止

繳秦塤宮觀劄子

五月一日
即日依奏

臣准中書門下省送到錄黃一道敷文閣直學士右朝
散郎秦塤狀昨自春官得請奉祠滿罷之後薦經憂患

累重仰祿欲望特差宮觀一次奉聖旨差提舉江州太平興國宮臣嘗讀唐明皇實錄載李林甫身死之後朝廷治其積愆諸子俱配流嶺南家口隨之每房各與奴婢三兩人并緣身衣服飲食自餘資產一切官收臣竊謂秦檜蔽奸稔惡天下之人戶知之天網不容使之自斃厥妻厥子繼踵淪亡不肖之孫官職如故華屋厚藏可謂幸矣為之計者政當恐懼屏迹不復自伍於縉紳之間今乃無所忌憚尚敢陳乞差遣雖宮觀甚小在有

罪者得之則人以為除用之漸臣懼秦檜黨與牽連相
慶自此皆有彈冠之心所謂一葉不去將尋斧柯者矣
況當國用不足而秦氏之家金珠充牣國家既已貸而
不籍凡前此教坊所汰之人墳皆養之於家以奉歌酒
之歡乃稱累重仰祿其公然欺世玩侮朝廷有如此者
臣愚欲望聖慈將秦墳宮觀旨揮更不施行所有錄黃
臣未敢書行取進止

繳潘粹卿恩澤劄子

五月三日

臣准中書門下省送到錄黃一道潘粹卿乞放行改奏
葉旁作恩澤事奉聖旨特令吏部放行令臣書行者右
臣取到前件公案檢照得潘粹卿將父遺表恩澤奏補
胡輔於紹興二十六年十月內降勅據本人稱胡輔未
受勅間於紹興二十七年三月內身死本人於當年十
二月內陳乞改奏與弟清卿於團練使上轉行吏部檢
坐條法只合作減年收使本人至紹興二十九年四月
內却經臨安府改奏異姓無服人葉旁作吏部節開告

示出違條限委是允當兼胡備當來勅命係身亡後旋
行寄納捏稱未曾被受已是詐偽今來陳訴曾於限內
陳乞係是乞與潘清卿轉官即非限內曾行陳乞奏補
今若特令吏部放行則是條法無用所有錄黃臣未敢
書行取進止

繳梁俊彥推賞劄子

五月六日次
日御筆並依

臣准中書門下省送到錄黃一道五月四日奉聖旨梁
俊彥合該軍器所皇城司酬賞可依正月六日四月七

日已降旨揮施行令臣書行者右臣竊見正月內軍器所推賞旨揮官吏轉一官資碍止法人特與轉行不及全年人紐計推賞繼因臣寮論列至今年六月實及二年方合陳乞四月內皇城司推賞初降旨揮梁俊彥特轉右武大夫續降旨揮令依例回授今來疊前兩賞並依已降旨揮有司未知所從若用正月六日旨揮即歲月未滿有碍條例若用四月七日旨揮即已令回授無可施行臣愚以謂爵賞天下之砥石所以厲世磨鈍惟

其明白而無偏私則僥倖之計不萌觖望之心不作自
來正使碍止法之人有特旨方轉行遙刺至防禦使方
轉過橫行所有皇城司被賞人宋鈞宋直溫皆是正使
轉行遙刺梁俊彥亦是正使與逐人一般前降旨揮獨
與超轉橫行則為太優後降旨揮却令回授又似未當
臣欲乞將梁俊彥皇城司賞典依宋鈞宋直溫例與轉
行遙刺其軍器所賞典即候闕月內合該陳乞之時照
應在職年月依條別與施行庶幾慶賞均一旨揮明白

無復偏私之弊輿人不得而議所有錄黃臣未敢書行
取進止

繳沈介不允詔劄子

五月十三日當日御筆荆襄上流為重兩帥頗多不

叶雖軍務稍靜尚須調護且依已降旨揮流行

臣准中書門下省送到錄黃一道湖北京西制置使沈
介奏為寒濕所中動作艱難心氣發動臨事繆忘乞解
職終喪奉聖旨不允令學士院降詔不得再有陳請令
臣書行者右臣聞父母之喪三年不從政禮法當然孔

子答子夏之問曰君子不奪人之喪亦不可奪喪也金
革之事無避亦聖門之所不與頃以軍興起沈介於苦
廬付以方面之寄介入國門而邊事漸已講解繼而信
使交馳兵戍各已休息自都督府及招撫使之類皆已
上印綬結局矣獨荆襄制司幕府如故一司官吏徒耗
俸廩其所辟置又屢為臣僚封還况介之事親嘗結清
議今舉朝斷斷以介不終喪為非朝廷若欲成人之美
不當以其稱病為文具而遏其請若更留數月雖介於

凱風寒泉之思無以伸其志使之重得罪於名教非所以愛惜人材也臣愚欲望聖慈許其解職終喪俾全人子之道則移孝為忠可以責其異日之報所有錄黃臣未敢書行取進止

貼黃 臣前件所陳若蒙聖斷施行所有制置司官吏即乞依都督府例結局罷散伏取聖裁

繳薛良朋等賑濟賞劄子

五月二十四日與給事中王時升同繳當

日批出辭
免依所乞

臣等准中書門下省送到錄黃一道薛良朋姜詵韓彥古辭免賑濟進職轉官奉聖旨依旨揮不允令臣等書讀者右臣等聞仁宗朝富弼守青州河朔大水民流京東弼行賑濟之策所活人至五十餘萬近世荒政之修無以加此繼而遣使勞弼即拜禮部侍郎而弼辭曰救災守臣職也卒不受今賑濟之術比之於弼固相萬萬陛下聖心焦勞非不切至然城都之外死亡之人亦不為少流尸滿川衆目所覩城中之人至於不食魚鰕而

三人者並皆遷官進職衆論以為未當夫建立百官所以為民不幸而有災傷又因而冒賞則監司守令之職果安在耶今三人者自知不安力具辭免若與從其所請則朝廷不失為民行賞而良朋等亦得辭受之正況今所在災傷不止一處若三人受賞不辭而浙西諸郡守令及被差官吏夤緣覬覦殆且數十百人而未止當此天災而反行濫賞豈所謂修政事以答天變者哉臣等伏望聖慈特賜睿斷將良朋等辭免進職轉官並依

所乞施行所有錄黃臣等未敢書讀取進止

繳王彥宣借人劄子

五月二十五日
次日御筆依奏

臣准中書門下省送到錄黃一道保平軍節度使提舉
太平興國宮王彥乞破行宣借人五十名及乞更破使
臣五名奉聖旨依令臣書行者右臣竊聞王彥近罷建
康管軍有自來親隨西兵三百人朝廷從其所請許存
留五十人餘者發回元來去處及發回之日有其數而
無其人者凡百輩則其久握兵權詭請虛券殆不知其

幾何人也今猶貪恠未已所乞宣借五十人及使臣五
名已蒙聖慈依許臣取到吏兵部狀節度使任宮觀合
破宣借十五人因紹興三十二年旨揮已行減半及依
例只許踏逐指使一名申朝廷差撥彥之專聞於江淮
無尺寸功得以節鉞奉祠幸矣尚此苟得無厭臣難默
默本人已有存留親兵五十人自當理為宣借之數若
聖恩從厚只合依條例占破難以過數陳乞所有錄黃
臣未敢書行取進止

再繳韓彥古劄子

五月二十五日上六月一日以彥古自請與外任

臣等准中書門下省送到錄黃一道韓彥古辭免轉官
依所乞者右臣等近為城外飢民死者盈川群目所視
而官吏以賑濟有勞全活甚衆推賞嘗輒具管見特蒙
聖慈曲賜開納朝廷已用逐人辭免依所乞臣等亦已
置而不論其間有韓彥古申狀乃云伏念彥古至愚極
陋之資非不知朝廷機務之煩聖恩不可屢鬱特以冒
詩人胡顏之刺寧甘以黷而群言之難犯有甚批鱗况

何功苦之足言霈此寵章之驟至與其他日險膚之見
詆孰若從容力祈之為優且省也伏望朝廷蚤賜追寢
庶幾小人毋得而議臣等觀其辭語險怪豈可陳於君
父之前播之四方豈不傳以為笑封繳之官乃輒指為
小人而謂公論為險偽膚受之言若臣等以小人而妄
議陛下不應聽從既蒙施行而被繳之人乃無所忌憚
公然見詆如此不惟桀驁不遜輕侮朝廷臣等不材備
位後省實難以振職所有錄黃并彥古申狀隨狀繳奏

伏望聖斷特賜施行

貼黃 臣等伏聞彥古昨除提舉官遭臣寮封繳自稱嘗論訴於朝廷臣等竊謂郎曹清班豈容此輩冒居伏乞聖察

繳馬監官轉官劄子

六月七日

臣准中書門下省送到錄黃一道奉聖旨牧馬監可依累降旨揮推恩崔良輔特於遙郡上轉行一官李楷王貴劉彥趙昌蘇信曹繹並轉一官姜子興陳邦俊並補


進武校尉人吏轉一官候出職日收使臣取到崔良輔脚色及紹興二十一年以後馬監推賞體例照得本人紹興十七年初管馬監之時只係武翼郎二十年間因管幹有勞八次遷官一次用賞出給料錢歷自副使轉橫行又轉遙郡至於右武大夫觀察使今又該轉承宣使恩賞僥濫無甚於此臣近因奏對及軍中賞典仰見聖慮宏遠愛惜名器非有功者不與今不知馬監每兩年之內孳長若干而十餘人遷轉至有白身補官者如

崔良輔數十年不徙職常法磨勘之外兩年一遷雖橫
行遙郡唾手而得自以謂例當然也今隸籍軍門若非
出戍用兵寄命鋒刃之下而有斬將搃旗之功者無緣
有此醲賞況祖宗成法在京官司因職任推賞之人若
或再任則不重賞今馬監遷官雖是舊例蓋有司失於
建明不曾有所搏節因循不革流弊至此臣愚欲乞裁
以中道應馬監官如已三經推賞則後來賞典並與減
半欲望睿斷更賜處分如是允當即乞立為成法及其

他官司賞典亦乞令大臣討論裁損其取到紹興二十
一年以後旨揮錄連在前所有錄黃臣未敢書行取進
止



盤洲文集卷四十八



總校官進士 臣 胡 榮

校對官庶吉士 臣 李廷敬

謄錄監生 臣 孫 珩

欽定四庫全書薈要

集部

盤洲文集卷四十九

五十二

詳校官助教臣謝登雋



欽定四庫全書薈要卷一萬五千七百九十九

集部

盤洲文集卷四十九

宋 洪适 撰

章奏九

荆門軍奏便民五事狀

臣伏覩紹興三年二月二十八日手詔應諸路守臣到

任及半年以上先具民間利病或邊防五事聞奏臣恭
惟陛下勤恤民隱出於天性臣以駑獯叨乘障之寄仰
體陛下愛民之心不敢以不可施行之事徒塞詔旨臣

自到任訪之於民云荆襄頃為盜區魚肉其民最甚凋殘之餘實與淮南無異今田畝既已起稅而逐年又有均敷茶額錢所出甚於夏秋常賦致使茶商執害民之柄而託吏為姦不惟民力重困又緣此不敢歸業數十年間所以民未加益并官田以附種為名而不稼納租麴引失立法之意而重疊出錙大禮代他州之貢而多方取辦皆不便於民者臣雖到任未及半年緣茶事所不可緩臣謹條次下項

一臣所謂茶商執害民之柄而託吏為姦者蓋江浙他路俱有茶額而食焉者衆商人隨時賣價四民不以為病惟創瘡之地戶口耗減而凋傷困乏蓋不能頓頃食茶如荊門軍又緣異時官吏不以疲民為念所圖溢額受賞歲增加至於數多若奉行前後朝廷指揮令客人從便交易則定額必致虧減官吏當有責罰本軍昨來遂以人戶為率計口均數如家有一丁則歲受茶

三斤其丁多及老小者以次增減至有一家買
十三斤者行之將及十年豪商與猾吏通謀為
姦其弊不一今荊門兩縣之民其客戶往來不
常外主戶纔及三千坊郭不滿闕百家逾年起
茶四百六十引客人就官入納每茶一斤為錢
一百八十一文足就旁近土產處買下等粗茶
雜以木葉每斤不直百文却逐年定價令民戶
每斤還五百三十文足會計本軍歲額官得客

人入納錢一萬七百貫有畸而民間償客乃費
三萬一千七百貫凡客人賫引到縣指定所欲
賣茶鄉分乞留元引只以縣帖下鄉稱某客販
到若干引令耆保差大小保長門到戶至應主
客戶并計口均敷或猾吏暗增引數或豪商均
茶已足計託牙駟妄稱人丁逃徙差互發賣未
足乞改別鄉吏既受賂更不覈實又與分下別
鄉或不即時批鑒元引致容往來影帶私販或

先以私茶憑牙駟欺民均賣續用縣帖再勒依數認買若爭拒不受客即委棄於地而去不惟疲民費錢重疊而遞年損折入納錢亦不為少皆緣歲額過多不敷則無由可辦商執其柄又以高價邀於官而求售在官者懼譴乃復黽勉曲從而滋蔓吏姦公私俱病臣比因草奏遂點檢倚郭縣二十八年内都保承受縣帖均分茶數已足而繳到客引尚多虧數縣吏却稱自均

數以來逐年遞趨以次年春夏季補充前一年之數蓋酒稅場務日生課利容有前後趨補今既將丁口數茶民間出錢已滿歲額而官引却有虧失者蓋是承襲作弊如前所陳臣已究治縣吏勒令填補榜示見行條法及續降寬恤指揮自今更不違法均敷但常額尚存則實惠難行若不控告朝廷剗革此弊則疲民困窮未能休息臣愚欲望聖慈憐念遠人許令荊門軍紹

興二十九年只以客人從便實往賣到茶數立
為新額或乞以見今歲額特賜蠲減一半庶幾
易於趁辦則害民之柄不在茶商茶商不能確
執高價自然從便交易是寬恤之澤實及千里
一二年間必有增戶之效

一臣所謂官田以附種為名而不稼納租者其一
曰營田其一曰學糧田所謂營田者前此邑官
緣以營田結銜既上司督責即指荒閒田土稱

為官莊初不遵依元降指揮修蓋屋宇置造農具名人耕作便行追集稅戶以物力多寡勒令認祖謂之附種營田至兩年一替供糾本鄉未曾附種之戶輪次認納吏緣為姦轉更教令糾挾善良每一戶替免至於追逮五七戶紛拏推託賄賂公行源源不絕舉縣咸被其擾遇新至之戶或乍佃荒田或只請住基而見充附種之人已投狀措令承代故有殫鋤未到畎畝茅茨

未庇風雨而營田官課已遭督責臣伏見前郊
赦文放免都督府官莊蓋是朝廷已知其弊今
荊門軍長林縣高陽兩莊當陽縣山口莊所名
營田係安撫司專差官兵耕作即是良田實收
課利并長林縣車橋兩處亦有官兵營田當陽
縣只有四戶開耕實田外其他兩縣營田共一
千七十七戶所納秋課自五斗有至於四十二
石者共一千八百餘石又有夏料小麥在外並

是無田認納臣到任據人戶訴稱所認課子逐年并是尉司弓手攬納每石有費錢三千者每戶各有小麥七升亦有費錢一千者即是稅上起稅實為重疊臣愚欲望聖慈行下將實有官田耕種去處依舊存留外其虛名營田勒人戶附種白納課子之數並乞除免

一臣所謂學糧田者蓋湖北兵戈之後沃壤彌望人力不給凡請佃逃絕荒田官司初不打量畝

步若人力有餘則逐歲四旁增墾其有沒官田
產即是酒戶抵當或公吏等人犯罪沒納者田
既籍沒則所種之客隨其地主又復他出頃年
再興學校郡縣奉承括到沒官田便名學糧初
無耕夫遂勒本保人戶分畝認米謂之附種學
糧皆是與本戶田土不相連接農人不便耕墾
例皆荒閑不免依數填納租課臣稽考縣籍長
林之安西鄉納學糧人一百二十三戶其一戶

有田通計長林九鄉納學糧者共二百三十三戶其有田者纔三十五戶臣今若受人戶之訴除其無田之租則學糧遂空無以養士若循舊不恤勒令認租則細民苦之無時而已緣本軍並無承平案牘即不見得舊管贍學錢糧之數兼並無寺觀絕產可充贍學臣以愚見相度本軍長林縣歲催學糧沒官田米麥二百石有畸而兩縣歲催常平戶絕田米麥八百石有畸臣

竊計本軍目今之數除累年秋夏未接間出糶
常平米接濟小民椿到錢一萬二千貫有畸糴
補未足外其見管米一萬一千石有畸義倉所
儲又在外本軍人戶稀寡設有水旱所費賑濟
之數不多每年老疾乞丐之人亦甚少臣愚欲
望聖慈許令本軍於長林縣戶絕田租內歲撥
米麥各一百石以充學糧其附種之數并賜除
免自後沒官田如人戶願耕即以其所佃隸之

常平二者既行則聖澤匝於阡陌遂見頌聲並作無田里愁嘆之音矣

一臣所謂麴引失立法之意而重疊出錙者在法諸鄉村去州縣二十里外有吉凶聚會聽人戶納錢買引於隣近酒戶寄造上戶納錢三貫造三石以其錢作朝廷封樁臣竊詳法意蓋謂民間有聚會之事親賓往來使之納錢買引則多得酒醴公私有補而行法之久并緣為害凡逐

縣就州軍請引至人戶投買之時縣吏視其物
力多寡抑勒出錢致有十餘千者既已得引酒
戶又復視其貧富勒令出錢亦有至十餘千者
初未嘗得酒中下戶緣無力出錢買引遂有過
期不成昏姻者其縣邑解發之錢未必一一皆
到州郡封樁上下相蒙剝割生弊臣雖已禁約
屬縣不得違法過數收錢及不得酒戶抑勒民
戶多出錢物外但賣引尚存則縣邑作弊難以

一一譏察臣聞越勾踐欲其民之繁息令女子
年十七不嫁者罪其父母今涇郡正欲生齒日
增乃因麴引而使失昏姻之時實害聖政臣愚
欲望聖慈咨詢大臣講求所以革弊之策或可
刪除此法實天下幸甚

一臣所謂大禮代他州之貢而多方取辦者臣聞
周之臣工助祭漢之列侯酎金各以其邦大小
任土作貢今湖外案牘不存遇大禮年分却令

荆門軍代靖州進貢大禮銀二百兩絹二百疋
又代峽州貢絹三百疋每疋折錢五貫文只於
峽州得絹本錢二百八十五貫而本軍自有進
貢銀絹各二百疋兩既小壘財賦不足如大禮
年分不免東移西兌非民何所從出官府既無
前牘可考若謂自承平以來二州之貢并是荆
門代納則向來川廣湖湘入京皆取道荆門軍
馬項背相望實為富庶之地今則僻在一隅去

水幾二百里非商旅所集最爾遺黎強名城郭
臣今不敢并乞減免若以靖州雜於溪徭賦入
稀少之時則本軍且乞為靖州依舊代納如峽
州則有四縣已多於荆門一倍又川江舟楫之
湊商稅所入非荆門比臣愚欲望聖慈許令荆
門免納峽州貢物庶幾不使一壘而供三州之
賦

荆門應詔奏寬恤四事狀

臣伏覩紹興二十八年九月一日聖旨令郡守奉行寬恤指揮如有未盡事件條具聞奏臣到任未及三月民之弊害未能盡知仰體陛下焦勞仁民之心夙夜黽勉凡所以綏惠凋瘵瑣細必行不敢逐一塵瀆天聽其大者四事每歲公私取於民幾三四千緡臣雖各已蠲免若非朝廷禁止恐向後又復檢尋前例兼恐他郡亦有此弊欲望聖慈特賜行下如有違戾許民戶越訴庶幾斯民永被德澤臣先次畫一開具須至奏聞者

一臣本軍每歲人戶秋苗有正稅米又有油麻豆粟雜色亦是折米近年受納官吏生弊將正稅米與雜折米令各作一鈔官倉則利於兩鈔畸零多收合耗而專斗則利於逐鈔各收糜費使用等錢上下侵漁比之舊年每歲多取人戶二千貫臣已將紹興二十八年所納米每戶并併作一鈔只是畫件聲說名色及裁減使用錢三分之二訖欲望聖慈特降指揮禁止以為永

久之利

一臣本軍酒務及公使庫舊例遇正旦寒食冬至各印關子付居民令戶戶納錢赴官沽酒自一百至一貫軍城數百家每一節出錢二百貫只是畧得些小惡酒雖一家百錢疑若甚微蓋凋郡難得錢物細民所居茅屋日出一間賃錢纔十二文而遇節頓出百錢比屋為病臣自紹興二十八年冬至以來已行蠲免訖欲望聖慈特

降指揮禁止以為永久之利

一臣本軍有獨石潭在江漢之旁產魚甚多舊以魚利添助支費昨緣改作放生池而本軍却將江潭下流強立地名謂之車湘灘上下堤楊子灘青术塌每戶雖不施網罟至冬月令縣尉追集泐江人戶將已前魚利之數均勒認納每歲得錢二百餘貫入公使庫臣已將紹興二十八年合收錢並行減免訖欲望聖慈特降指揮禁

止以為永久之利

一臣管下當陽縣每歲遇人戶納夏秋二稅并令
先納嘗酒錢以家業多少為率自五百至三千
雖賃地僑寄之戶亦令地主抱認凡一年兩次
出錙幾及二千貫臣已榜示自紹興二十九年
革絕訖欲望聖慈特降指揮禁止以為永久之
利

盤洲文集卷四十九

欽定四庫全書薈要卷一萬五千八百

集部

盤洲文集卷五十

宋 洪适 撰

章奏十

謝宣示御書臨帖狀

為大人作

伏蒙聖恩差中使宣示臣御書臨帖者宸翰昭回儼龍蛇之飛動使輶臨示驚奎壁之光輝拭目知榮撫躬有幸恭惟皇帝陛下體兼衆妙聖本多能天下無雙信義之之北面帝中第一邁齊祖之前聞何取微臣獲窺睿

藻已陋登牀之舉詎知肆筆之方忤蹈惟深鋪張莫究
徽州除浙西提舉赴闕奏方庚狀

右臣前因陞對嘗以幫源洞豪方庚奏陳猥蒙聖慈開
納面得天語令便與大臣理會臣即日至樞府納劄子
陳述曲折又以劄子薦其武勇可為土豪繼聞宰執奏
事聖訓再三以臣管見為可採仰見聖慮深遠又以前
車為戒臣竊恐朝廷尚未施行臣踈遠無識知恐愚者
一得之慮或有小補不避犯分之罪敢復言之臣聞幫

源四邊俱山險其中坦夷有田可耕居者甚衆方庚實
為之桀聚族皆憚服之所欠朝廷一真命為重紹興二
十四年李洸知徽州日方庚以歲旱率其黨五十餘人
至郡借糧本郡疑其為後患守臣接之廳事館之僧寺
置酒郡圃以兵官主席又於教場閱習禁軍馳射令方
庚觀之守臣囑其控制盜賊方庚欣然承命且云萬一
要使喚之時只得一白帖權攝巡尉便當詣前其人黑
而長徽人謂之方庚三面稱之為保義衆皆能言非臣

敢為虛語前年嚴州草竊聞守臣亦嘗令攝威平寨官
實欲羈縻之以此見得方庚志在官爵臣雖不得其聚
兵實數傳者謂已有銀槍壹萬而三衙逋卒頗亦亡命
其間亦有弓矢轉相教習若天時無水旱內外無甲兵
則此豈足置慮萬一疆場有警其黨近在畿甸之內恐
小有跳梁便相牽制為肘腋之害貽宵旰之憂臣謂軍
興之際右列一命固不深繫名器之重若朝廷呼之觀
其人物語言果有可用處以密院一使臣名目小人易

於感恩便可得其死力即是狙詐作使之術縱使萬槍皆
出虛傳只得一方庾如土豪用之且令招集民兵使其果
有徒黨便可化為王師隨其多少皆是得用於朝廷有利
而無害臣已別具奏薦之乞賜行出伏望聖慈更留宸
慮冒犯天威臣無任昧死

繳進太祖皇帝御書奏狀

右臣仰惟陛下天縱聖德同符藝祖留意軍政信賞必
罰沈幾獨斷與天為謀頃年先臣以使事久繫異域訪

求於廛市之間換易於酋渠之家前後所積凡得乾德
開寶中御府編次太祖皇帝御筆數十卷其間有及軍
政者雖數百之錙五斗之粟一疋之縑亦勞宸衷為之
節減至於遷補軍職招接降寨賜予衣襖下至油麵柴
炭之屬區處塗竄委曲纖悉所以規模宏遠成無疆之
業傳授至於聖神二百載而中天仰繩祖武重規再造
臣昨日因宣召入對已嘗奏陳面奉玉音許令進入但
以表飾損舊臣不敢輒易亦欲見前此御府不為華飾

務從簡樸如此今奎畫龍文復歸天上以備乙覽以助
聖政蓋先臣寶藏之志也所有太祖皇帝御筆六卷謹
隨狀繳進伏候勅旨

水災應詔奏狀

八月一日

臣今月一日准尚書省劄子七月三十日三省同奉
聖旨政事不修災異數見江浙水滂有害秋成朕自
八月一日避殿減膳思所以應天之實可令侍從臺
諫卿監郎官館職疏陳闕失及當今急務毋有所隱

劄送臣者

右臣聞災變之發率多緣類而起漢儒一一牽合則有附會不經之失然理之當者亦不可因噎廢食而曲為之說臣謹按漢書五行傳云陰氣勝故其罰常雨水傷百穀姦軌並作魯莊公十一年秋大水董仲舒以為魯宋比年為乘丘鄆之戰百姓愁怨陰氣盛故二國俱水厥後水災皆歸之兵興民怨所致國家自數載以來兵民死於戎事肝腦塗地者不鮮父母妻子啼號之聲未

絕也陛下有兼愛南北之心而獷狻變詐干戈未可得而戢今水不潤下江湖逆溢田疇溝澮與河渠連而為一已秀之禾不得而穫下民嗷嗷未有生意官無積藏安得人人而飽之霖潦彌月勢猶未已陰氣可謂盛矣陛下畏天愛民至誠惻怛明詔廷臣使之盡言堯舜之用心也臣愚以為陰勝陽之沴夷狄闖于外姦宄蟄於內也今外之所以待強隣者朝廷有潛筭小臣不敢輕議而區區愚慮竊恐季孫之憂不在顓臾臣入對之始

及輪進故事皆以歸正人為憂繼因晚召亦嘗奏陳仰
勤天問矣數旬以來漸已萌芽臣幸因奉詔敢復詳言
向之為美談者皆曰中原遺黎望王師之來則簞食壺
漿願削左衽所以襁負而至又其思慕聖德之切者臣
在江淮之間二年所聞殊異於是蓋山東仍年旱蝗耕
者無所得食故扶老攜幼南來偷生又聞趙王世隆之
徒聚眾攻剽彼國指名蹤捕亦以荒歲故牽連親戚相
率來歸其意蓋欲王師恢復因得乘勢橫行逞其所欲

上可以得官爵次可以得金帛子女不失歸其故鄉既
來之後大失素望更相嘆恨而將帥所部又役使詈辱
無以得其驩心去夏賈和仲以督府之令驅其孥累數
萬口冒暑而來絕海遇風已葬魚腹而婦人老穉數百
同舟蒸鬱相搏疾病枕藉死者不暇瘞埋既抵所屯雖
計口給粟不能充飢愁怨之氣上干陰陽之和實在於
此初到京口則掘山中草根以代蔬茹數月之後三五
成羣掇拾棄菜敗蘆於市廛之間其計無聊何以久處

此臣目擊耳聞者如此其人之在山東皆有室廬南畝
生生之具自若也今父子數口雜於方丈之舍上雨旁
風無以蔽障甚者寢處於泥淖之內以他人視之不可
一朝居也雖使禽鳥豈不思歸欲歸無計則姦軌之謀
不得已而作今日誅甲明日誅乙必草芟獸獮然後已
況邇來北方已有招納之榜又有誅誘之人其黨聚於
江浙兩城散於淮甸諸郡去帝城不遠亦復有之一呼
相應特未艾也或曰叛者已治是大不然譬之急湍奔

流勢必赴壑於其中間築土以拒之終於衝軼橫潰而止耳臣之管見以謂其人赳赳可用大勝江浙所募若使人給家足無飢寒匱乏之患樂補軍籍之缺誠為大利若其懷土不忘則宜優其歸費送以舟楫使之踰淮而去則可以窒患於未萌施恩於不報怨氣可弭天災可消或曰縱之使去不若遷之別壤以離其黨是又不然此輩捐生業棄墳墓遠來歸我亦招誘者誤之今遷之別壤居上者誰有仁民之心官又無以贍之客居窮

處速其死耳是無罪而殺之也可不念哉當今陰盛之患在外者猶可隨機而應在內者莫急於此蓋浙西非盜賊窟穴雖流徙困殍必無弄兵之事臣私憂過計伏望聖鑒曲賜采擇而區處之至於譏切時政毛舉小事言而難行徒以沽名賣直則臣所不敢冒犯天威臣不勝戰汗

辭免中書舍人奏狀

今月二十五日准尚書省劄子三省同奉聖旨除臣中

書舍人日下供職者臣聞命震驚罔知所措竊以班登
禁密選貴西垣不獨掌行制書蓋亦與聞時政惟敏才
不至固陋庶繼溫純之詞必特操無所阿私乃振糾駁
之職如臣者駑材何筭鼠技易窮遇聰明睿智之君莫
伸管見攝禮樂文章之事祇懼素餐屢叨稱獎之榮常
賜清閒之燕坐文茵於帝所豈美金蓮來捷步於日邊
特盼珍茗比因宣召面諭恩除甫爾半旬有茲異渥遭
逢若此報稱謂何自知短絆之不可汲深或謂積薪而

後來居上滿盈不戒顛越可憂伏望皇帝陛下俯矜螻
蟻之誠曲寢絲綸之命俾安愚分得允僉言所有恩命
臣未敢祇受謹錄奏聞伏候勅旨

舉自代奏狀

准令節文諸侍從官授訖三日內舉官一員自代者右
臣伏覩左宣教郎太常博士兼權吏部郎官何稱種學
績文蜚聲俊域使之掌制必有可觀臣實不如舉以自
代謹錄奏聞伏候勅旨

辭免奉使轉官奏狀

右臣今月十五日准尚書省劄子三省樞密院同奉聖
旨洪某與轉行一官臣聞命震懼不知所措伏念臣備
數從班常虞尸素方鄰國修好初講慶儀猥蒙選擇予
節以行萬里往來曾無補報錫賜之物已慚虛受又叨
進秩深所不安凡人臣事君東西南北唯命之從況兵
鋒既息道路無壅不應以奔走微勞便受賞典伏望聖
慈追寢誤恩使免譏議冒犯天威臣無任

辭免除翰林學士奏狀

今月二十二日准尚書省劄子三省同奉聖旨洪某可
除翰林學士兼中書舍人日下供職臣聞命震驚罔知
所措竊以北門典誥所出西掖命令所行秩清地密必
得其人然後可以處如臣者學問淺陋議論濶疎掌制
踰年已試無取糾駁之職常恐曠瘼近者陞對伏蒙天
語諭以翰長之除而又嘉其論事許令批勅臣誤辱眷
知方切悚懼敢期成命遂叨超拜內自循省代匱之久

初乏才長仍兼故官則怨隙日增必致顛踣伏望皇帝
陛下興憐鴛蹇曲賜保全特寢異恩俾逃呵譴

舉自代奏狀

今月一日准告授前件職准令節文諸侍從官授訖三
日內舉官一員自代者臣伏覩左文林郎主管尚書戶
部架閣文字施元之學問該洽文采清新使居英俊之
躔可備翰墨之選舉以為代實允公言

盤洲文集卷五十